

alla fuyuant la route des deux premiers. C'est icy que la pauvre mal auisee se des-
forte, n'ayant plus à qui parler, si ce n'estoit aux bestes, contre lesquelles elle estoit
en guerre nuit & iour: & si la grace de Dieu ne l'eust soustenuë, c'estoit pour la faire
entrer en desesperoir, veu que, come elle m'a dit, elle fut plus de deux mois, que tous-
iours elle voyoit des visions les plus estranges qu'homme scauroit imaginer: mais
tout aussi tost qu'elle prioit Dieu, ces fantosmes s'esuanouissoient. A la fin, ayant par-
l'espace, comme i'ay dit, de deux ans cinq mois demeuré en ce lieu, come quelques
navires de basse Bretaigne passassent par là, allas pescher des morues, elle estant sur
le bord de l'eau, leur criant à l'aide, leur fit signe avec fumee & feu. Et quoy que au
commencement ils pensassent que ce fussent illusions des Demons, qui trompent
les passans, attendu que l'Isle n'auoit iamais esté habitee d'homme viuant, que de
bestes rauissantes, & d'oyseaux, & de vermine, si est ce que à la fin ils approcherent,
& sçachans que c'estoit, la receurent au nauire, & ramenerent en France: de la bou-
che de laquelle i'ay sceu & entédu ceste pitoyable hystoire de sa penitence. Et quoy
que i'eusse ouy parler, come de chose asseuree, de ces espritz malins, si est ce qu'elle
m'en assura dauantage, & me dist tout fois, que depuis les deux premieres nuictz
iamais ilz n'auoient approché leur logette, n'y ne c'estoient montrez visiblement,
que iusques à ce qu'elle fust seule: & que lors encor cela ne dura, sinon tant qu'elle
estoit sur la grande aprehension de ses tristesses. Et me dit outre, que lors quelle s'em-
barqua dans ces navires de bretaigne, pour s'en retourner en France, luy print vne
certaine volonté de ne passer plus auant, & mourir en ce lieu solitaire, comme son
mary, son enfant & sa seruante, & qu'elle desiroit y estre encor, agitee de tristesse
come elle estoit. Je sçay bien, que quelques folastres euentez, apres m'en auoir ouy
faire le discours, comme il est aduenü, y ont augmenté des folies & menfonges, les-
quelles ils ont interees parmy leurs fables & hystoires tragiques, desrobées de ça &
delà. Lors que ceste femme me ramenteuoit ses pourceux, me souuint de deux Por-
tugais, lesquels ayans perdu leur nauire en l'Isle des Rats, y demurerent deux ans
entiers ainsi qu'auetz entendu, parlant de ceste Isle: me vint pareillement en memoire
vn Euesque Nestorien, & cinq prestres de la mesme secte Nestaurienne, lesquels
s'estans embarquez dans vn nauire passager d'vn marchât de l'Isle de Baharen, pour
passer du sein d'Arabie à celui de Perse, (ausquels estans en pleine mer, fortune fut
si contraire par l'impetuosité du vent du Nord, accompagné de foudre & tonnerre,
qu'il sembloit que le Ciel & la terre d'eust s'engloutir au profond des abyssines) ad-
uint que ce vaisseau fut ietté par ce vêt & orage, bien pres d'vne Isle, ayant trois lieues
de tour, nommée des Arabes, & marquée dans leurs Cartes, *Alfobatta*, à cause qu'elle
est faite en la forme & façon d'vne carleure de soulier. Vne heure apres auoir mouil-
lé l'ancre, vn Prestre Persian Mahomeran, faisant son oraison selon la coustume du
pays, s'escria si hault qu'il peut, & dist à ceux de sa cōpagnie, que tout leur equipage
estoit en danger d'estre perdu, si l'on ne culbutoit ledit Euesque & tous ses compai-
gnons, dans ceste mer parfonde. Mais autres plus pitoyables de ceste secte ne furent
de tel aduis, ains plustost les conduire dans l'Isle, pour y finir leurs iours: ce qui fut
fait assez courtoisement sans recevoir d'eux vne seule iniure. En mesme instât qu'ils
eurent mis pied à terre, le vent qui tousiours s'augmentoît, fait choir sur le tillac le
mast, qui creuassa les principaux de la troupe. Le nauire en mesme instant se vint à
ouurer, & se perdirēt lors plus de trois cens cinquante qui estoient d'entre eux, avec
quelque nōbre d'Esclaues, qu'ils auoient acheptez au Royaume d'Egypte: & ne resta
de viuant que ces pauvres Chrestiens, ainsi que me fut recité à la ville de Tor, pres la
mer rouge, par l'vn de ceux qui s'estoit sauué du peril: & alloient ces Chrestiens à vn

*Histoire
d'un Eues-
que Nesto-
rien.*